


Liuka Vana Hungumwisa,

Ku Kaye

 Yesu Kulishitu, Mwa Neyi, kaha natuhane vyuma vyosena chawana muli Kulishitu. Etu tunasakwilila kuli Ove, Mwata, ha malisesa aze wunatuhane kuhichila mukutohwa chachinene cha Mulambu uze Yesu atuhanyine kuze ku Kavali, mangana atukindulwise cheka mukulikata na uselewa na Ove, mangana tuhase kupwa na echi kungalanya chakutachikiza evi vasoneka, “Kachi enu namutwamanga muli Ami, kaha Mazu Ami muli enu, enu kalombenu kala chosena namuzanga, kaha navakamilingilacho.” Jino, etu twasakwila hali echi, kaha twalombo nge Ove uyenga nakutuhana lufwelelo lwakufwelela na vyosena vili muli etu.

² Jino echenu tutulike kusali, Mwata, kala kukilikita cha likumbi, nakuzakama cha chiyoyelo, kufuma kwosena kuli wamundende nakuli kafunga, nge kuhone kupwa numba chuma chimwe mu vishinganyeka vyetu jino, oloze kupwenga kuvandamina, kwivwulila kanawa hali Shipilitu Wajila kuhanjika kuli etu, nge tupwenga vakuhasa chuma chimwe chamwaza, mangana kukutachikiza Ove chikuma, ha kukunguluka chetu hamwe. Mwomwo, Mwata, muchano vene omu mukiko tuli nakwiza mulikumbi kana lyakuzuma. Hanjika kuli etu kuhichila mu Lizu Lyove lya kuyoya, kaha echa Lizu lya kuyoya litwame muli etu na kutwama muli etu, mangana vatufule na kututunga, keshi nge mwakaye, oloze vatwalumune ha kutulingisa kupwa vavahya mushipilitu yetu, mukufwana cha Mwana Kalunga. Mamalelo, michima yetu yeji kuchikima omwo natushinganyeka, na livaji lya kuwahilila mu myono yetu, kutachikiza nge etu vanahase kutusanyika kupwa vana vamaunga na vamaapwevo va Kalunga. Etu tunemana aha museto wa Kwiza Chove chamuchivali, kaha mafuchi osena na mawangana chikima kumahinji etu, vyuma vyosena vya kaye vili nakukuma, oloze kutachikiza nge likumbi limwe Ikiye mwakeza kaha mwakatutwala mu Wangana muze kamweshi kapwa numba makumishilo, mokomoko, navakaya nakuufumisamo. Kaha kushinganyeka nge tuli jino va—va kutela ou Wangana! Ove Kalunga, alamisa michima yetu na matwitwi lelo, na—na Shipilitu Wajila, kuhichila mukukosa cha meya aha Lizu. Etu twalombo echi mu Lijina Lyove na upahu Wove. Amena.

³ Ngwatondo kumbata mutwe wachihande chino chimene. Ha, Ngwapwanga nakuya nakuhanjika ha chuma chimwe chindende chakuhandunuka numba kachi kwapwanga kutanga cha kuka, oloze twavilikanga nge makati akulombelela

vatela kuwahana na lwola lwa eyiti, palanga na ku eyiti seti mokomoko naine koloko. Kaha Ngwapwanga kaha... Billy ezanga kuzuvo minyutu yayindende hanyima kaha ahanjikanga nge kakwapwile numba umweko, shikaho ikiye kahananga makatiko akulombelela. Shikaho etu natuya na... Ngwashingtonayeka kumbata kutanga kana echi, kupwa kwolola liuka. Kaha Ngwatondo kuhanjika ha mutwe wachihande: *Liuka Vana Hungumwisa, Ku Kaye*. Ngwatondo kutanga chimwe jino kufuma mu Mukanda wa Vakakuyula, kapetulu 16, kuputukila ha vasi ya 10.

Kaha Ndelilaambile kuli Samasone ngwenyi, Tala, unanguhende, unangwongo: achingulweze jino, Ngwakulembelela, omwo ove navahashila kukukasa.

Kaha amwambile ngwenyi, Kachi nge enu navangukasa na jifungo jajihya jichili kanda vajizachisa mulimo, kaha Nanguzeyya, nakupwa nge muthu weka.

Ndelila ambachile jifungo jajihya amukashile najo, amwambile ngwenyi, Ove Samasone, va Fwilishite, vanakuwane. Vakakuswaminjina vapwile muzuvo yakusongo. Kaha ajimbitwile nge wanda hamavoko enyi.

Ngocho Ndelila ambile kuli samasone ngwenyi, Kunyima unanguhendenga, unangwongonga: ngulweze omwo ove navahashilakukukasa. Kaha amwambile ngwenyi, Kachi mambongi akumutwe wami atanu naavali...kachi nauwaselwila, muchindambwa.

Kaha apapalileko na jimbambo, kaha amwambile ngwenyi, Samasone, Va Fwilishite vanakuwane ove. Kaha atonene kutulo twenyi, kaha jimbambo lwamwalachi aluzokwele, nachindambwa hamwe nawa.

Kaha uze pwevo amwambile ngwenyi, Ngachilihi weji kwambanga ngwove, Ngunakuzange, oloze muchima wove kaweshi kuli yamiko? unanguhende jino katatu, kahaomwo...mwatwama ngolo jove jajivulu; kawangulwezelemoko omwo mwatwama ngolo jove jajivulu.

Kaha chasolokele, omwo amulembejekelenga ikiye hakumbi hakumbi na mazu eyi, na kumushijila, ewwile vangu nge kufwa kumuchima wenyi;

Kaha amulwezele muchima wenyi wosena, amwambile ngwenyi, Kaha ha mutwe wami kanda vazunduleho yembe; mwomwo Ngunapu ngu Najili ya Kalunga kufumisa hakusemuka mujimo lya mama: shikaho kachi nge Navanguteula, kaha ngolo jami najingufuma, kaha Nanguzeyya nakupwa nganaomu vapwa vathu vosena.

Jino Ndelila omwo amwene ngwenyi nangulweke muchima wenyi wosena, atumine muthu nakusanyika...va myata vava Fwilishite, ngwenyi, Twayenu jino kamwe kaha, mwomwo nangulweze lyehi muchima wenyi wosena. Kaha va myata yava Fwilishite vejile kuli ikiye, kaha vamunehelile jimbongo, mokomoko vamunehelile jimbongo mumavoko eyi.

Kaha uze pwevo amusavalikile tulo hamambuli eyi; kaha asanyikile muthu, kaha aze mabongi akumutwe wenyi atanu naavali awatewile; kaha...uze pwevo aputukile kumuyanajisa, kaha ngolo jenyi jamufumine.

Kaha amwambile ngwenyi, Ove Samasone, va Fwilishite vakuwane. Kaha atonene kutulo twenyi, kaha alyambile ngwenyi, Nangulovoka nge makumbi eka, nakulipakumunavo. Oloze katachikijileko ngwenyi YEHOVA na ngufumu lyehi.

⁴ Jino Ngwatondo kutanga, cha mujimbu wa ou mutwe wachihande, uli mu Mukanda wa Kusoloka, kapetulu 2, kuputukila ha vasi 21 na 23.

Kaha Ngwamuselelele tando mangana ngwami alumuke; kaha kasakile kwalumuka kuujila wenyiko.

Iwva, Nangumumbila hakahela, kaha vakakulinga nenyi ujila kaha nanguvambila muluyando lwalunene, kachi nge keshi kwalumuka kuvilinga vyenyiko.

Kaha vana venyi Nanguvajiha namusongo wachita; ngocho mauka osena nawakatachikiza ngwavo Ami yami mukakutalatala muvishinganyeka na mumuchima: kaha Nangumihana muthu himuthu kutesa na vilinga vyenyi.

Echa Mwata ahake kukisula Chenyi kutanga cha Lizu Lyenyi.

⁵ Samasone, wamunene nge liuka, aputukile kanawa. Aputukile kuya mujila yamwenemwene. Aputukile kanawa, kaha vamuvulukile kupwa chingazule chalunga waundume. Aputukile kanawa, kuzachila Yehova, mukulama Lizu Lyenyi na kulinga mwaya Jishimbi Jenyi. Kaha chize chapwile nge omwo lyapwa liuka. Lyaputukile kanawa, nge omu tunahase kuhanjika, nge kusoloka chakaye, lyaputukile natambo ya mwaza. Aputukile kulama Jishimbi ja Yehova. Kaha chikalu Samasone akavangijile Yehova, kaha Yehova amuzachishilenga Samasone.

⁶ Mwomwo, Kalunga nahase kulama kala muthu na kuzachisa kalamuthu uze ali nakumukavangiza Ikiye, mwomwo echi chinapu kusekasana cha Kalunga. Oloze omwo natwalumukila kusali, kufuma vyuma vya Kalunga, kahajino Kalunga keshi kuhasa kutuzachisa chekeko. Omwo natuya nakutambuka

hamwe na Jishimbi ja Kalunga, omwo natuya nakutwama mumapapilo a Mbimbiliya na kulifukula kuhichila mu Lizu vasoneka, kulifukula kuli Ikiye mu Shipilitu na mu Muchano wa Lizu, kahajino Kalunga nahase kukuzachisa hakapanji. Oloze omwo vakiko navambata vishinganyeka vyakusali ya vyuma vimwe, kahajino Kalunga keshi kuzachisa kala muthu chekako.

⁷ Shikaho, Samasone alingile nge—nge kwimanyinako liuka halyo halyo lelo. Omwo liuka lyaputukile, Kalunga ahashilenga kuzachisa liuka, mwomwo liuka lyatambukilenga nge mwayile Jishimbi ja Mwata, alamine viyulo Vyenyi vosena na vilika Vyenyi, kaha alingile Jishimbi Jenyi josena. Kaha Kalunga apwile hamwe na liuka. Oloze chinasoloka nge kuli kuzeya chimwe muchi kaliuka.

⁸ Anuka, etu katweshi mumangongoko, oloze tuli muchana cha jita. Vathu vavavulu veji kaha kushinganyekanga nge omwo naveza nakupwa Vakakulishitu nge nge kunahu chikiko kaha chinatondewa, nge nge kunahu haya myaka, hakupwa Vakulishitu kaha vyuma vyosena vinakwenda kanawa. Kanda numbathu kupwa nechii mumutwe woveko. Mwomwo, Ngweza nakupwa Mukakulishitu mangana nguzunge, kuzunga kuzunga chamwaza cha lufwelelo. Ngweza nakupwa Mukakulishitu, mangana kupwa jila ya jita. Tuli maswalale Vakakulishitu, kaha etu twatela kupwa vakulongesa na kukulisa, kaha kutachikiza tuzachilo twosena twaliyavolo, kutachikiza mwakuzungila, kutachikiza nomu na—na kuzunga na kuzunga. Kaha etu tunahase kaha kulinga nge omwo Shipilitu Wajila mwaya nakusolwela kuli etu. Etu katweshi kuhasa kumbata vize lifuchi likwavo nalitulweka omwo natuya kujita, vishinganyeka vyavo vimwe. Oloze twatela kumbata vyishinganyeka vyetu, mujila kana Shipilitu Wajila mwaya nakutwaminyina, kaha vyishinganyeka vize Ikiye mwaya nakutuhana, mwomwo Ikiye Mukulwane Mwangana wajita wa maswalale ja Vakakulishitu.

⁹ Samasone alingile mwamwaza, ikiye apwile lunga wamunene palanga nomu aputukile, aputukile nge (tunahase kuchivuluka nge) muthu wakukasunuka, palanga nomu aputukile kufuma mungalila yenyi. Kaha liuka nawa lyalahile kanawa, kaha lyapwile kanawa palanga nomu vakiko vaputukile kufuma mungalila javo. Samasone aputukile usendo. Kaha ikiye kapwile nausendo na kanyike wapwevo waka Isaleleko, aputukile kupwa nausendo na kanyike wapwevo waka Fwilishite.

¹⁰ Kaha echi chili chalifwana na omu linalingi liuka nawa. Kalya putukile kulinga zangi na mwalyoko, oloze naliya kulivakakuzeneka kufwelela na kuputuka usendo na vakakuzeneka kufwelela. Aha hakiko etu tunalingi chuma chachinene, kaha kuluwisa chachinene, chili nge liuka naliputuka kulinga vyuma vize kavyesi vyakwolokako. Naliputuka kulama, nge Samasone, kupwa na lizavu lya lyalipi.

¹¹ Samasone, makumbi osena apwilenga mulizavu lya vathu va Mwata, ikiye alingilenga kanawa. Oloze omwo ikiye aputukile usendo na lizavu lyalipi, kahajino ikiye angilile muukalu.

¹² Kaha omu mukiko chili na liuka. Omwo liuka lya kavgijile kanawa kaha hakumbi hakumbi mukutwaminyina cha Shipilitu Wajila, Kalunga avakiswilenga, kaha vikomwesa na vinjikizo na vihayamisa vya kavgijilenga liuka. Oloze omwo lyaputukile kupwa nalizavu lyalipi, na kaye! chuma chimwe chachipi chikuma chinalingi, kaha chuma chatete chinalingi, linaputuka kulivwasana, kuhokola kulikata mukachi kavakakufwelela, mwomwo vakiko vanawana nge mafuchi valivwasanyine. Oloze ou Mujimbu wamwaza waunene kaweshi wakukujika kulifuchi limwe mokomoko vathu vamwe. Uli wakukujika kuli “wosena mwasaka, echa ezenga,” mafuchi osena, miyachi, malimi, na vathu. Kalunga kanda lyehe ajine etu kufunda jingiza.

¹³ Oloze vathu vatondele kupwa nge, vakiko kupezelesa, mokomoko kusondezeza hali veka, kuya nge—nge omu kaye kalinga, kuhanjika vyuma vize veji kulinganga, kufukila mujila vakwavo vafukilile. Etu katweshi kuhasa kupwa nakufukila hakulinga vyuma nge omu veji kulinganga kaye. Tunahase kaha kufukila kaha nge natukavangiza vilika vya Kalunga na kulinga mwaya jila Yenya. Katweshi kupwa, hakulondezeza mwaya kaye. Kachi kambanyi ya makanya yinafukila mwamunene kuhichila muchisaji cha mivwimbimbi, kaha lizavu lya wala na whiskey vanafukila mwamunene kuhichila mukukafwa chisaji chamivwimbimbi, echi kacheshi chinjikizo chaliuka nachikaya nakulingisa liuka kufukila kuhichila muchisaji chamivwimbimbi. Kufukila chaliuka chatwama mukachi ka kunanangula Mujimbu wamwaza, wa Ngolo ja Kalunga, na kusoloka cha Shipilitu. Katweshi kuhasa kuhanjika mwomwo chisaji chamivwimbimbi chalingi *munganji mukananga* hali kambanyi ya makanya na—na jikambanyi jikwavo! Katweshi na Chisoneka chimwe cha kweseka kupezelesa navakiko vathu. Kaha kachi nge etu natulinga, tunahase kukoka jinambala jajinene ja vathu, oloze chize kacheshi mukiko atongwele Kalunga etu kulinga. Twashinganyeka mwomwo nge etu vosena tuli vaulombo, vakutuka helu, lizavu lyalinene, kulingisa kutemwina chachinene kusoloka, chize kupwa kufukila. Etu tuli nakufwa hakumbihakumbi kumahinji etu, nge kuhanjika muchishipilitu! Kachi etu natwimana nakuzama cha teni miliyone mukijikiza chimene chino, kaha Shipilitu Wajila keshi nayetuko, tunalingi kanawa kwimana mwakuzama teni na Shipilitu Wajila nayetu. Katweshi kuhasa kupezelesa na kaye.

¹⁴ Kaha chuma chimwe chatete, chapwile, liuka kuputuka kulivwasana vavene. Kulivwasana chatete chapwile na liuka lya Katolika, kahajino nakukavaho liuka lya Luteleni. Omwo valivwasanyine mu liuka lya Katolika kulilingisa kupwa lizavu lyakulivwasana, likumbi limwe kwapwile mutambi, “Va

Fwilishite vali hali ove, Samasone,” kaha Samasone ahokwele vindambwa vamukashilenga vya liuka lya Katolika, kaha Martin Luther ejile, na lizavu lyakulivwasana.

¹⁵ Kahajino vakiko vakashile liuka na chindambwa chikwavo, nge omu alingile Ndelila. Kaha vakiko vaputukile. . . kachi vapwenga na muthu wakusanyika kuli Kalunga, muthu uze vanasanyika kuli Shipilitu Wajila; pamo katachikiza na AEI, oloze vakiko vatachikiza Kulishitu. Kahajino liuka lyengilile mukusolojoka, na muvyuma vyavihya mwaya kuhanjijeka cha milingu. Kaha vakiko vatelele kuhana vakakuvanangula “doctor’s degree,” wosena atela kupwa na Undotolo wa Ukalunga. Echi chapwile chindambwa chikwavo chakukasa liuka. Malunga veji kuya nakulinangula, kala kuliwana kweseka kulovola mukakulinangula wamwaza shikaho mauka avo anahase kukoka, “Kafunga ketu apwa Ndotolo wa Ukalunga.” Kaha vakiko valingile chuma muka? Umwe esekele kupwa nakunangakana chikuma kuhambakana mukwavo. Chamwaza, echi kachalumbunukile nge chumachimwe kumeso a Kalunga ko.

¹⁶ Kaha kachatondekele kala muthu numba umwe kweseka kumbata kunangakana cha kaye na kuvwisa Kalunga kuwaha. Echi chinapu chaunyengwe kumeso a Kalunga! Enu kamwashi kuhasa kuvwisa Kalunga kuwaha na kufwila na kunangakana cha kaye, mwomwo “chapwa kole na Kalunga,” mukiko yahanjika Chisoneka. Ikiye keshi kuhasa kuchilingako.

¹⁷ Kaha wosena eji kwesekanga kupwa na kunangakana chosena. Vakiko vanatachikiza mwakulingila na mazu akuhanjika, kaha nachiza nakupwa nge kuhanjika cha milingu kachi chipwenga chakusolola kungolo, ou Mujimbu wa Shipilitu Wajila eji nachingila na mumuchima wa muthu na kuwana shili jenyi. Vakiko vali vakulongesa mwakuhanjikila milingu, kaha etu katweshi nakutonda chizeko. Paulu ngwenyi, “Lize Lizu lyejile kuli etu, keshi kaha. . . mokomoko, ou Mujimbu wamwaza, mu Lizu kaha, oloze kuhichila mu Ngolo na kusoloka cha Shipilitu Wajila.” Uze anehela Mujimbu wamwaza, kusolola jingolo ja Shipilitu Wajila! Oloze vaze malunga vosena veji kuyanga kumashikola kaha kulinangula kutanga chachinene, omwo vatela kwimana kumeso avathu, omwo vatele kusoloka vavene, omwo vatela kuvwala na omwo vatela kulinga, nge kavatela kuzachisa hanjikiso yayipiko. Jino, echi chili chosena chakwoloka ku kuhanjika cha milingu, oloze etu kwatweshi nakukavangiza mazu akutaka amuthu ko. Paulu ngwenyi, “Ou Mujimbu wamwaza Ngweji kunangulanga kawejile ngochoko, oloze Wejile kuhichila kutungulula cha—cha Shipilitu Wajila na kusoloka cha Ngolo.” Kawejile na kuhanjika chamwaza ko, echi enu vakamangana munahase kupwa, mokomoko enu mwahaka lufwelelo lweni mumangana a muthu. Oloze wejile kuhichila mukusoloka cha Ngolo ja kusanguka cha Kulishitu.

Ou ukiko Mujimbu wamwaza, “Kumutachikiza Ikiye mu Ngolo ja kusanguka Chenyi.”

¹⁸ Wosena eji kwesekanga kushinganyeka mwamwaza chindende kuhambakana muthu mukwavo, chikungulwilo hi chikungulwilo. Va Mesondisiti navaya nakuhanjika ngwavo, “Tukwechi muthu wamwaza.” Va Mbaputishiti navaya nakuhanjika ngwavo, kaha liuka lyavaka Christ, kaha navyangocho, vakiko vosena, “Etu, etu tuli vamwaza. Etu, vathu—vathu vetu, katwechela kala muthu kuya na kunangula Mujimbu wamwaza.” Oloze veji kuvenyikanga. (Ove Kalunga, tuvwire keke!) Kuvenyikanga; kachi nge vali namikanda na kunangula chimwe, kahajino vakiko veji kuhaka nga muliuka. Kalunga keshi kuhasa kumukwata numba mujila yimwe. Ngwatondo muthuumwe kunangula kuli yami uze napu wakwinyika na Shipilitu Wajila, Kalunga namukatula, keshi wakwinyika kuli muthu ko mokomoko vikungulwilo.

¹⁹ Kunangakana chosena! Vakiko ngwavo, “Mamalelo, tunatachikiza vyosena Evi,” kaha vathu vamwe vanahono kutachikiza numba mwakutangila Shipilitu Wajila. Vakiko veji kukana Echi.

²⁰ Echi chilinakungwanukisa kamukanda kamwe kakandende Ngwatangile likumbi limwe ku California, mumyaka likumi kunyima. Ngwambachile muzuvo yakulandulula mikanda. Ngwavulyama ausonekele hiya. Wapwile mukanda wa mangwa kaha, oloze wapwile namangana amwe kusoloka nge lyepe na nge kutaka kaha. Oloze, Ngwawanyine chuma chimwe muze chevwanayinae nge Kalunga, kuli yami. Kaha mujimbu umwe waundende waputukile ngana. Chimene chimwe muchikalanga cha tusumbi, mwapwile ndemba umwe wamundende uze ashinganyekele nge apwile na chinyingi chize chatelele kuchitachikiza. Shikaho ikiye atukile helu lya chimbokishi na kuveta chizuku chenye chindende ha chimbokishi, kawana mokomoko kapapa katanu, kumbila mutwe wenyi kunyima na kuvilika nge omu mwavilika ndemba. Kaha vakwavo, ikiye atungumwishile vakwavo, kaha ikiye ngwenyi, “Mapwevo na malunga vamuno muchikalanga, Nguli nakutonda kuhanjika kuli enu muchimene chino ha kutangisa chashikola echi nguneza nacho.” Ngwenyi, “Ngunawane chinyingi chachinene mukulinangula chami,” shimbu apwile nakukoka vivanjilo hameso eyi. Kaha ikiye ngwenyi, “Ngunasakula nge etu tusumbi tunahase kuliwahisa etu vavavene hakupwa na chinyingi. Shikangaho, Nangumilweza nge, kachi nge natufula na kuzata muno muchikalanga mokomoko wina, natuya nakuwana vitamin yimwe nayiya nakutulingisa etu vandemba kupwa kanawa, namangona amwaza. Kaha, mamalelo, Ngunahase kumilweka omwo natuhashila kuliwahisa etu vavene mujijila jakuhandunuka handunuka.”

²¹ Kaha vana vethu vavandende na mawengele avo, ali akupulijeka kaha ngwenyi, “Echi kacheshi chamwazako?” Kaha vakiko punduvene vamukumbwile. “Mamalelo, ali ndemba wamangana!” Eji kunwanukisa vamwe ava vakakunangula vakumashikola. “Muthu wamangana! Nakutondeka cheka kupwa hamwe na ava tusumbi vakwavo, twatela kuya hamwe naikiye.”

²² Chamwaza, shimbu kanda ou wamundende akumise kuhanjika, kwapwile weka nawa kasumbi wamundende uze kapwile na mangona awazako, ejile nakulaha kufuma muli vakwavo muze muchipango, kaha ngwenyi, “Vakwaze, munyutu kaha! Ngwevwanga kutambakana chakalinwaha ku chisaji. Tusumbi vanavahakila mutengo wa fwo ngwe ha pound, etu natuya kuchijihilo hamene! Kaha kuwaha cha chinyingi chove nachiya nakulinga ika?”

²³ Ndumbu walunga, chinyingi chosena echi tunahase kulunjika, kuwaha chacho chika? Etu tuli kwishi ya majilo! Natuya nakufwa na ichi kaha muminyutu. Chinyingi chetu kulumbununa ufwefwekete. Ngwatondo tumutachikizenu Ikiye. Oloze vakiko veji kulinganga echi.

²⁴ Nge omu Nguli na kuhanjika lwola lumwe hanyima ha chamba chimwe chachindende, kaha ikiye ashinganyekele nge natachikiza kunangakana nge—nge atela kutachikiza, kaha ikiye atachikiza chikuma nge nahase kulweka vosena vapwile muchamba hali muthu. Shikaho ikiye atukile helu lya chipango kaha ikiye aputukile kuhanjika hali muthu, omu ikiye atachikiza hali vakiko. Kaha, kukasumuka, professor kufuma Mukuzangajala atambukile na kuputuka kuhanjika mazu akuwahisa kanawa kuli ikiye, kaha uze mukweze apilumwine meso na kwalumuna mutwe wenyi kaha . . . Jino, apwile na meso, ikiye nahase kumona professor. Ikiye apwile namatwitwi, ikiye nahase kumwivwa. Oloze, mukiko vene, ikiye katachikijileko ovyo apwile nakuhanjika. Mwomwoika? Ikiye apwile wongo wachamba. Ikiye apwile na wongo wakajila. Mukiko kaha akwechi. Ikiye kapwile na wongo wamuthu, shikaho ikiye kashinganyekele nge muthu.

²⁵ Kaha chochimwe muthu keshi kushinganyeka nge Kalunga! Enu muli vathu, kaha kunangakana ka kaye kanahambakana wongo wa chamba. Vyosena namulinga, naulikolesa kaha ove lyavene naechi. Enu mwatela kupwa na muchima wa Kulishitu.

²⁶ Mulonga vathu veji kuyanga na kulinunga na lizavu, na kushishisamo kulimeneka mulivoko keshi kusemuka chachihyako, vakiko vali nakweseka kutumbuka kusemuka chachihya. Vakiko vakiko kavazangile kusemuka chachihya. Kaha vakiko—vakiko vanatachikiza etu tweji kunanagula echi mu Mbimbiliya, shikaho vakiko vanatondo kushishisa chuma chimwe muli echi. Kaha vathu va Pendekosita vali kaha vavapi,

kweseka kushisa chuma chimwe! Vakiko vali nakutonda echi mushikola. Echi chatela kupwa wahelu, “Natuya nakulimeneka mumavoko na kwingila muliuka, kaha kupwa kukumwangila mokomoko kujimika,” mokomoko chumachimwe. Vakiko vali nawoma wa kusemuka. Nguli lwola lumwe kufwelela Mbalaka ya Branham ili nakwivwa woma!

²⁷ Jino, etu vosena tunatachikiza nge kusemuka, Kangwazakamako okwo chili, mokomoko kulihi, kulihi na kulihi, echi chili majilo. Kachi kema nasemuka ha vihwahwa, hamavu hakukola, mokomoko mukapete kachipatela chakuwahisa na ulombo, awa ali majilo, mukala jila. Kaha kusemuka cha mwana ngombe, kusemuka chakala chuma, ali majilo.

²⁸ Kaha kusemuka chachihya chili chamokomoko kuhambakana majilo! Oloze vathu vakukakachila, “Natuya kuze veji kulimenekanga mumavoko. Natuya kuze vazeneka vakiko kupwa na kutambakana na kulila, na kuveta ha kamenga na kutambakana.” Enu mwatondo kupwa muthu kaha! Chuma tuli nakutondo shina kusemuka, kufwa, chize nachineha Kuyoya!

²⁹ Mbutu, tamba yamwaka, mbutu ya tamba, enu mbatenu tamba nakuyihaka mumavu. Palanga nomu namupwa najitamba jajiha, yize tamba yamwaka yatela kupola. Linona kalyeshi kuhasa kuneha kuyoya kuvanga linapolo.

³⁰ Kaha muthu mokomoko pwevo keshi kuhasa kupwa nakusemuka chachihya ko palanga kutanga na uthu watela kupola, kufwa, kufwa kukamenga, kaha kutambakana kupwa na majilo osena, kuheta kuchihela nachipwa chakukakachila na kukola yenu, kaha enu munasemuka cheka ha Shipilitu ya Kalunga. Kangweshi kulizakamina nge enu na mutambakana chikuma, namuhanjika mumalimi, namutumbuka helu nahamavu, kujajangila nge kasumbi wakuvatula mutwe, muli kaha nakuneha Kuyoya chachihya! Oloze etu tunashishisamo chumachimwe muli echi, etu twatondo jila yakutona, punduvene.

³¹ Likumbi likwavo, ha Chitanu, pwevo lyami na Yami twapwile nakuya kuchitanda. Kangwatondele kuyina hali echiko. Oloze omu twayile nakushikumuka mujila, Ngwatwalileho kwalumuna mutwe mujila yimwe nakukwavo, mapwevo vauselesele. Ngwamushikile Kalunga omwo Ngwapwile muthu wakapuputa, kachi Ikiye mwahindula meso ami Nanguya nakutala hachuma chimwe chize chakwoloka. Kaha Ngwalamina kakulusu kakandende kakusukama mumotoka yami. Omwo Ngwamwene chuma changachize, Ngwatalilenga ha kulusu na kuhanjika, “Ove Kalunga, Omu mukiko Muuswamo wami,” nge Nangutala ha kulusu.

³² Ngwamwenenga vase mapwevo. Meda ngwenyi, “Katwamweneko umwe pwevoko lelo uze navwale chifunga.” Kaha ngwenyi, “Bill, tala hali uze pwevo uze ali kuze na tumilapi twatundende hamujimba wenyi,” kaha ngwenyi, “ove unakungulweka nge uze pwevo katachikiza chakuhengako?” Ngwenyi, “Kachi katachikijile nge chakuhenga ko, kaha ali wakulwangana muwongo wenyi.”

³³ Ngwambile ngwami, “Munyutu kaha, uchi wami. Ikiye apwa ka America, eji kulinga nge omu valinga va America.” Ngwambile ngwami, “Ngwapwanga mu Finland hanyima chindende, ove muchima wami.”

³⁴ Kaha Vanguhulile kuli lunga umwe uze angutulikile hamavu, Ndotolo Manninen. Kaha twapwile nakuya ku—ku kusana chakulikangula, kuze vavuluka “sauna,” kaha vakiko navakumbata nakukwingisa na kukwichila meya akakahya, mokomoko meya akakahya hamalolwa, kaha naakulingisa ove kutukuchila. Kahajino vakiko navakulingisa ove kutumbuka mu meya amakaza, kaha nakukinduluka. Kahajino kukumbata nakutwala mukapete, kaha muze muli manasi, va mapwevo vase veji kuchekanga malunga (kaha vakiko nawa vali uselesele), kaha nauhiluka cheka muze muchijiva. Kangweshi kwingilamoko. Kaha Ngwambile ngwami, “Ndotolo Manninem, echi chakuhenga.”

³⁵ Ikiye ngwenyi, “Chosena chakwoloka jino, Wamulemu Branham, echi chakuhenga. Kaha ngachilihi enu mandotolo va American namuzula mapwevo uselesele kaha nakumuhaka hamesa, nakupima ku—ku kuupwevo wenyi wosena? Ngachilihi enu manasi muvipatela?”

³⁶ Ngwambile ngwami, “Lisesa, Ndumbu walunga Manninen, Manninen, ove unoloka.”

³⁷ Chuma muka echi? Chapwa chisemwa. Omwo Nwapwile mu Paris Ngwahonene numba kuchifwelela, nge mipila yakusushila ya malunga na mapwevo yapwa yoyimwe. Ngwahonene kwivwushisa, nge tupete twakunokela twapwile kusali ya jila twapwile twavosena namalunga na mapwevo. Ngwahonene kuchifwelela nge omwo mapwevo navaya kuchisekeseke nakusana, kanyike walunga na muchima wenyi, vakiko kavapwile nakapete kakuvwalila ko, vakiko vanafumisa uvwalo wavo swi nakaze kakwishi, kahajino kwalumuna jinyima javo na kuvwala milapi nakwingila nakusana, oloze mukiko vene. Vakiko kuli zakamina chiku. Chize chapwa chisemwa chamu France.

³⁸ Mu Africa, mapwevo na malunga, vanyike chipwe vakukola, kaveshi numba chakuvwalako, kutambuka nakuhita muvyana. Kavatachikiza na kapete kakunokela kapwa kaka, mokomoko vyuma vimwe, chipwe kufuma kumeso amukwavo. Oloze

vakiko vanahono kutachikiza chihandwa. Vakiko kavatachikiza chihandwako. Oloze chili chisemwa cha mafuchi.

³⁹ Oloze Ngwambile ngwami, “Uchi wami, etu twahandunuka, twafuma ku Lifuchi likwavo. Twapwa vakakuzuzumana na vangejihano, echi chikiko chilingisa kumona vyuma nge vinahenge. Mwomwo Mbimbiliya ngwayo, ‘Vaze veji kulivulukanga ngocho, nakulisanyika, vakiko veji kusolola nge vakiko vapwa vakakuzuzumana kaha vangeji, vakiko vali nakutonda mbongi yili nakwiza.’”

⁴⁰ Lunga mokomoko pwevo mu Italy, mu France, mu Africa, mukala lifuchi, uze asemuka lyehi chachihya cha Shipilitu Wajila, keshi kulinga vyuma kana ko. Vakiko kaveshi kuhasa kuvwala uvwalo kanako. Vakiko kaveshi kulinga ngachize, mwomwo vali vaku Lifuchi likwavo Likwechi Mukakuliyula na kulitenga ali Kalunga. Twafuma Mwilu. Eyi shipilitu ili muli enu, yeji kuhizumwisanga chiyoyelo chenu. Kachi ove uli ka American, muya nakulinga nge ka American. Kachi uli ka French, nauya nakulinga nge ka French, kaha mutoleka mukwenu. Oloze kachi uli wakuli Kalunga, muya nakulinga mujila vakiko vejikulinganga Mwilu, mwomwo Shipilitu yove yafuma Kwilu kaha Yeji kukuyula ove.

⁴¹ Chuma chimwe chachindende ove unahase kutalaho. Mu Chisoneka, vaze veji kutondanga Mbongi yayihya, veji kulinganga mwakuhandunuka. Vakiko veji kulivulukanga kupwa vakakuzuzumana kaha vangeji. Oloze kusali ya Kena, vakiko vaneza nakupwa vakakuchina kaha vanapu vakakufumbukila. Oloze Vakakulishitu vapwa vakakuzuzumana kaha vangeji. Vakakuchina kaveshi na limboko, mukakufumbukila napu muthu mukakuzuzwisa. Oloze mukakuzuzumana ali wamwenemwene, kaha afuma kumavu aku Lifuchi lya mwenemwene, kweseka kuwana kuwana jila yakuya Kwimbo, kuhanjika kuhichila mukuyoya chize chenye nge ali nachuma chimwe nge afuma ku Lifuchi ikwavo. Ou ukiko mulonga.

⁴² Oloze vaze vathu veji kulinganaga ngocho, vaze vathu veji kuvwalanga vyuma kana, echa ngumilweke. Mu South Africa, omwo Ngwamwene seti sauzande ya vakakuzeneka kutona, vali uselesele, vakusalila. Sikiteni-, eyiteni-, na myaka twende yakusemuka kanyike wapwevo, na walunga chakuzeneka numba muhya wakuvwala, kwimana kuze na ulova kumeso avo, kaha kwakufunda funda, na vifuwa vyakuhita mumazulu avo, na tumenga twamitondo kusukama kumatwitwi avo, kaha mujikambu javo munahitasana chifuwa mokomoko vifuwa vya vathu, namazo atunyama akuzezeleka halivakiko, uselesele nge omu vejile mukaye, kaha kavatachikijileko. Oloze omwo vakiko vatambwile Kulishitu, kaha valimbukile chameso hamavu na kutambula Shipilitu Wajila, vakiko vahindukile nakuvunga mavoko avo nasonyi mujitulo javo, omu vapwile nakuya

kaha nakuwana uvwalo nakuvwala. Mwomwoika? Vakiko vejile nakupwa vakakuzuzumana kaha vangeji kuli kano kaye. Haleluya! Vakiko vapwile vakufuma kuli Ikiye. Eyo, mwane.

⁴³ Mamalelo, eyo, ava vathu valivuluka kupwa Vakakulishitu. Vakiko vatwama kumauka. Vakiko vayile na kuhanjika, “Etu twapwa va Mesondisiti. Etu twapwa va Mbaputishiti. Etu twapwa va Pendekosita. Etu twapwa va Seventh-day Adventists. Etu twapwa *echi, muze, na chikwavo*.” Echi kacheshi nachuma chimwe chakulinga naechiko. Shipilitu yenu, kuyoya chili muli enu, vyeji kuhizumwisanga na kwambulula enu mwapwa muka. Yesu ngwenyi, “Ha mihako yavo hakiko namukavejivila.”

⁴⁴ Eli liuka lineza nakupwa nge Isalele, chakulivanga. Vakiko vanamono mafuchi avakashili kupwa na mwangana. Kalunga apwile Mwangana wavo. Kaha vakiko vamwene mafuchi avakashili kupwa na mwangana, shikaho vakiko vatondele kuzata nge mafuchi avakashili, kaha vakiko valinehelele mwangana. Kaha omu valingile ngana, vakiko vengilile muukalu. Kutwalilaho chaputukile kwiza nakwingila. Kutwalilaho kaye kaputukile kulivembelamo mulivakiko. Makumishilo songo yacho muli Ahave. Umwe mwangana ejile nakupandamako chindende kuli echi, kupandamako chindende kuli echi, kaha makumishilo chapushile nakufumisa kuyoya muli vakiko. Kaha vakiko vayile. Kaha omwo Mwangana wamwenemwene ejile, vakiko Ikiye kavamutachikijileko.

⁴⁵ Echi chikiko chuma chochimwe na liuka linalingi. Linetavila. Yenu hano. Linetavila milingu, kutanga. Linetavila kulivwasana, mazavu, mauka amanene, vakakunangula vahelu. Kaha omwo Mwangana wamwenemwene mweza, vakiko Ikiye kavechi kamwijivako, kaha vali nakusukika uze vene Shipilitu Wajila uze ali Mwangana wavo. Vakiko Ikiye kavamutachikizako, oloze vakiko veji kumuseha Ikiye na kumusekeleka Ikiye. Nge omwo va Yuleya valingile na Meshiya yavo, liuka lili nakulinga mujila yoyimwe na Meshiya yavo. Vakiko vanahono kutachikiza. Vakiko kavechi na meso amushipilituko, mwomwo vakiko vali vakulingisa chikuma meso avo vinanagwilo na ovyo vali nakumona, mazu amanene, kweseka kupezelesa na kaye. Katweshi kulizamisa—kulizamisa nakupezelesa na kaye ko. Etu veji kutuzamisa kupwa vakulikehesa etuvavene.

⁴⁶ Kaha, umwe kaha ikiye ali hali vosena, muli Kalunga. Kaha lelo mukwambulula kuhindula omu muwande, muli nge kulipechela, muli vakakulipecha. Umwe ngwenyi, “Chamwaza, Kalunga amikisule, Nguli namasauzande amavulu. Ngukwechi kuliwana chachinene kuhambakana ove.” Chihandwa muka chili aha? Etu tukwechi yimwe mokomoko miliyone yimwe, chihandwa muka chiliho? Etu tuli vamuchano na Kalunga? Tuli vamuchano ku Lizu Lyenyi? Tunakwimananga kukweseka cha Shipilitu Wajila? Muchano vene? Echi chikiko chuma chivene.

⁴⁷ Oloze etu tweji kulivwasana ha Mbimbiliya. Vathu jetu vavavulu va Chipendekosita, ha Kunangula cha chikuku cha Mbimbiliya, kulivwasana. Kuli. . . Kangwazangile kunyengatesa umweko. Nguli muliuka lyami, kaha Ngulinakwivwa nge Nguli—Ngulinge chuma muka, muliuka lyami, mwomwo Nguli nakunangula Mujimbu wamwaza. Oloze kuli va Pendekosita teni sauzande vakakunangula vanatachikiza nge kuli chuma chamuyachi ngana mu Mbimbiliya nge kujimbika mulijina lya “Tata, Mwana, na Shipilitu Wajila.” Nguli nakupaisa archbishop, mokomoko kalamuthu, mungulwekese kuze muthu umwe vajimikile mulijina lya “Tata, Mwana, na Shipilitu Wajila.” Oloze vakiko vali nakulivwasana, mwomwo chize chikungulwilo chili nakulinga ngocho. Kuli kaha muthu umwe mu Tesitamende Yayihya, kaha munahichi seli handulendi ya mwaka hanyima yachechi, kutessekese na mujimbu wakunyima, oloze vajimikilenga mu Lijina lya Yesu Kulishitu. Chuma muka echi? Chikungulwilo. Vanalingi ngana. Kulivwasana!

⁴⁸ Kaha lelo vakiko vanafumisa vakakuzata mujila nakuvafumisa mujila. Vakiko vanafumisa vichakachaka muliuka. Vakiko vanafumisa upahu wosena kuufumisa muliuka, nakuhakamo kunangula chakutangisa, kunangula chachindende cha liwengele lya ndemba, chakuwahisa kanawa mulizavu, kaha mapwevo javo vanavwale jiputula na jindeleji jize jakulikwata navikova vyavo, kaha malunga kunwa makanya, na kusekasana chawiji na kuhanjika usese wamajilo. Echi chili chasonyi kumeso a Kalunga! Ngunatachikiza echi chili chakufukuluka, oloze lunapu lwola muthuumwe ahanjikile chuma chimwe. Kulivwasana, kulihana, kuzata nge kaye!

⁴⁹ Kangwalizakaminako kachi Nangwimana ukawami, chakuzeneka kupwa naumwe oloze na Kalunga kaha, Nanguya lika nakunagula Muchano wa Mbimbiliya ya Kalunga na kuwimanyina Ukiko. Kachi nge Nangufwa, Nangutwalilaho kwimanyina Muchano. Punduvane. Etu twatondo Muchano. Nanguya nakupima kutessekese na liuka, oloze kutessekese na Lizu lya Kalunga Ngwatondo kupima.

⁵⁰ Oloze Ndelila, mwatalisanga? Ikiye atachikijile nge Samasone apwile na ngolo. Kaha katachikijileko okwo kwatwama ngolo jenyi. Ikiye kahashileko numba kwambulula omwo japwa jize jingolo, oloze kwapwile ngolo jajinene jize Samasone apwilenga najo, kaha ikiye atondele kutachikiza. Kaha, nge Ndelila, ikiye atwalilengaho kumwongejeka Samasone kuhichila mukuwaha chenyi. Mamalelo, ikiye alivwikilenga lyavene mwausunda. Kaha ikiye atambukilenga kumeso akiye kaha natukukunya twakuzunduka nge vanyike vamwe vavandende lelo, kaha—kaha navyangocho, kaha kutonda kusoloka nge chuma chimwe, wa kuhichilila, kweseka kumwongejeka Samasone.

51 Echi chili chuma chochimwe kaye kanalingi kuliuka. Jino kulihi kuli Ngolo jenu jainene?

52 “Chamwaza, kachi etu natulivwasana kaha, kaha echi nachiya nakuhokola Ngolo.” Eli liuka lya Katolika linalingi ngocho.

53 “Oloze va Fwilishite vali hali ove, Samasone.” Kaha Luther ejile nakulovoka.

54 Kahajino vakiko valivwasanyine cheka. “Kachi muya na kungukasa navindambwa vikwavo, kaha namungukwata.” Shikaho vakiko valingile ngocho.

55 “Kaha va Fwilishite vali hali ove, Samasone.” Chasolokele ngachilihi? Wesley ejile nakulovoka kaha ahokwele jize jindambwa.

56 “Jino ove unanguhungumwisa kakavulu. Kawatachikijile nge Ngwakuzanga ove, Samasone? Chosena chakwoloka, ngulweke muchano uli mumuchima wove.”

“Chosena chakwoloka, ove ngukase na chindambwa chikwavo.”

57 “Chosena chakwoloka, jino etu natuya nakulinga ngocho.” Chuma muka echi? Echi chinapu chindambwa chavikungulwilo.

58 “Enu ngwechenu yami ngupwenga wakukasunuka, nge Kangweshi na chikungulwiloko. Kahajino, Nangumilweka, enu namuya nakuhokola.” Shikaho mwalovokele vamwe va Pendekosita. Kulihi kuli Ngolo jenu?

“Va fwilishite vali hali ove.” kaha ikiye ahokwele chindambwa cheka.

59 Oloze jino chasolokele ngachichilihi? Echi chakwachile va Pendekosita, vaze va Ndotolo va Kutahisa na tufunga twavo, malunga vamwe vavanene. Vakiko vapwile na shikola yayivulu na michato nge va Mesondisiti mokomoko Mbaputishiti, mokomoko kala muli vosena vakwechi. Yako muliuka kaha enu munahase kwivwa “amena,” ya kututa nge mukuta wava Eskimos vaze vatwama kuze ku North Pole. Vatuta! Vakulihandununa! “Kaha jino va Fwilishite vali hali ove, Samasone.”

60 Va Fwilishite vali hali ove, America. Nyi chize kulinunga cha shipilitu chikulihi? Nyi chize kulinunga cha va Pendekosita chilikuihi? Va Assemblies of God, nava United, nava church of God, na *ava*, na *vaze*, na *vakwavo*, umwe naumwe vali na ism akuhandunuka, ou umwe na *chize*, kaha namukwavo na *chize*. Etu tunahokoka palanga nomu namuya nakwingila mumbongi na kupwa na kuhizumuka, kachi liuka limwe linakafwe, vosena kaveshi kupwako. Va Communist vali hali enu, America.

61 Nyi jize Jingolo jetu jikulihi? Nyi upahu wetu uli kulihi? Chuma muka echi? Mwomwo twayile mwaya mangana amuthu

keshi mwa Ngolo ja Kalungako! Mwomwoika, vakiko vakwechi vakakunangula na vyuma vili vyavikalu kaha vyakuminyina, palanga vakiko nomu vanalivwasana palanga nomu tunapu vakuminyina kaha vakukakama jishingo, palanga vathu... Enu mwevwa lyehi kutambakana muliuka chaka nawa? Enu kamweshi kevwa kala muthu kulilako. Chitwamo chavakakulila chili kunyima. Kakweshi cheka numba upahu muliukako. Vyosena twatela kulinga shina kutwama kunyima vakujijila nge omu tunahashila. Twashi vakukasunukako. Twapwa vakukashiwa. Uze liyavolo, na va ndemonyi vakutona, vanakase liuka lya Kalunga wakuyoya. Echi chakwoloka. Kakweshi cheka Ngolo muliukako. Kakweshi cheka kukasunukako. Vathu vali kaha vakuminyina na kujijila! Mwomwoika, Kalunga nahase kwiza mukachi kavathu va Pendekosita, kaha kusolola nhe Ikiye apwa Kalunga, kaha kwinjikiza vinjikizo Vyenye vya kusanguka Chenyi, echi chavanyikisako vakiko. Upahu! Mwomwoika, echi chili chasonyi! Ngweji kutambuka nakuhitangana mulifuchi, Kalunga alinakuzata, kusolola vinjikizo, kaha vathu vanatwame, kaha, "Chamwaza, Ngwafwelela nge echi chinapu chakwoloka. Mamalelo, Ngunatachikiza kacheshi kulingikako." Echi kacheshi kuhasa kutambukisako! Mwomwoika? Vakiko vanapu vakukashiwa na Ndelila, uze kaye. Vakiko vali mujingoji.

⁶² Jino vakiko vanavakwachilamo, kuvakashila mu cnfederation. "Va Fwilishite vali hali ove, Samasone." Muya nakulinga ika hali echi?

⁶³ "Mamalelo, tukwechi chikungulwilo chachinene." Punduvene. "Tukwechi vathu vavavulu kuhambakana omwo twapwile." Oloze Shipilitu ali kulihi? Shipilitu Wajila ali Kulihi?

⁶⁴ Omu mukiko liyavolo nalingi. Echi kumbembejeka chili muliuka. Echi chitwalilaho kulembembejeka liuka, "Twaya kuli yami, Nanguya nakukuhana mbalaka yayinene kuno kachi nauya nakulinga *echi*. Kachi nauya nakufumisa ou mukakunangula wachileya, kaha mbata muthu, ou Ndotolo wa Kutahisa echi chikwechi mangana, natuya nakutunga liuka lyamwaza lya mbwende na naliya nakupwa nge kunoka mulivamwe." Sonyi hali enu! Chamwaza kupwa na muthu uze wakhona kutachikiza mwakuhandununa kofi kuyifumisa mumakunde, oloze apwa wakuzala na Shipilitu Wajila, echi chapwa chakhona kulivwasana, na Ngolo ja Kalunga.

⁶⁵ Oloze echi chili, mamalelo, shikaho chili chakuminyina, palanga nomu vakakujila vakuhutwa vanahase kuhita mukuliwana na kuhanjika malimi, mokomoko kutambakana chindende, mokomoko kulinga chuma chimwe, kaha vosena navaya nakulikomokela na kutala. "Chuma muka echi? Chamwaza, kulikomokela mwomwoika? Uze atela kupwa nge chileya kuholoka kumwe." Munatachikiza nge ou unapu muchano! Vakakujila vamwe vakakuhutwa kwingila,

kupwa vakuwahilila chikuma kukatula mavoko avo, kaha kutambakana na kwalisa Mwata, muthu umwe uze mwatambakana “amena” kukunangula cha Mujimbu wamwaza, na vosena kwalumuka na kumona ovyo ikiye ahanjikile. Echi chinapu Chipendekosita. Ukalu uli hali? Enu muli nakutwala mwaya Mesondisiti, hanyima ya Mbaputishiti; vakiko vatwalile mwaya Katolika; Katolika mwaya hetese. Kaha, vyosena hamwe, vili mwaya hetese! Chakwoloka.

⁶⁶ Ndelila namimbembejeka enu mumauka amanene, amwaza, vakakuzata vakunangakana, kumbata na lizavu lya mwaza. “Chamwaza, munatachikiza, *Munganji na mukananga* atwama hano apwa wajimiliyoni, kachi etu natumumbata ikiye ezenga mu chikungulwilo chetu! Mamalelo, yami!” Kachi ikiye kapwa wakusemuka chachihya ko, kahajino ikiye katela kupwa kuzeko. Kangalizakaminako kachi ikiye ali na jindola miliyoni. Kachi ikiye apita Minyau fwote, chipwe ajikwechi, ikiye atela kusemuka chachihya, twaya kaha kukusemuka chachihya na kupwa wakutungulula na Shipilitu Wajila, kaha kulovoka muze mukusemuka chachihya, kufwekula (vangukonekeleko), kulila na kutambakana, kaha nakutwalilaho nge vosena omu veji kulinganga, kaha kuyoya chiyoyelo mangana kwijikiza nge ikiye Achikwechi. Amena. Omu mukiko enu munatondo.

⁶⁷ “Samasone, va Fwilishite vali hali ove.” Va Communist vali hali ove. Kaye kali hali ove. Liyavolo ali hali ove.

⁶⁸ Vakiko vakindulukile kaha vakiko vamwene Shipilitu ya Kalunga kuzata vikomwesa na kulinga vyuma Vyenyi vya kusanguka, ovyo Yesu ashikile, vakiko ngwavo, “Munatachikiza, Ngwashinganyeka Ndumbu walunga Branham akwechi kutahisa. Kafunga kami ngwenyi echi chili cha liyavolo.”

⁶⁹ Enu vakuhutwa, vakakulyonga, mukakuzeneka kufwelela wakuhungumwisa, wakuwahisa kanawa, enu tungunge muuvwalo wamikoko! Yesu ngwenyi, “Kachi munangutachikiza Yami, kachi munatachikiza likumbi Lyami.” Oloze enu mukuta wa va Saulu vaze vanakweseka kumilingisa enu kupwa nge kaye kosena.

⁷⁰ Twatondo mukuta wavathu ja Kalunga vaze vanahono kulivwasana na Lizu, oloze kunangula Muchano na kwimana ha lujimiko lwa Shipilitu Wajila.

⁷¹ Oloze kaye kanalingi ika? Echi chatewile Ngolo jenu josena. Enu mwasemukile kupwa Najili, Pendekosita, oloze kaye katewile Ngolo jenu. Jino echi chinapu chakujijila hali vosena.

⁷² Chuma muka natuya nakulinga? Chuma muka nachiya nakusoloka? Kuli upahu umwe Ngunahase kushinganyeka kukumisa echi kutanga.

⁷³ Shimbu Samasone apwile wakukasa! Katweshi kuhasa kupwa na kuhizumukako. Ivwulila kuli ndumbu walunga, Billy Graham, “Kuhizumuka mulikumbi lyetu!” Ivwulila kuli

Oral Roberts kutambakana, “Kuhizumuka mulikumbi lyetu!” Ivwulila kuli vosena, “Kuhizumuka mulikumbi lyetu!” Natupwa ngachili na kuhizumuka ohonyi etu vanatukase? Etu tuli vakukasa na Shipilitu Wajila, na lizavu na visemwa, kaha katweshi kuhasa kupwa na kuhizumuka cha Shipilitu Wajila. Amena. Ngunatachikiza kunazumu nakwocha, na ngonde, oloze echi chinapu Muchano. Natupwa na kuhizumuka cha Shipilitu Wajila nge enu muli vakukashiwa na kujijila! “Kufwana chakumukomoka kalunga,” Mbimbiliya ngwenyi vakiko navakapwa. “Kufwana chakumukomoka kalunga, oloze navakana Ngolo jacho.” Ngolo jaka? Ngolo jachikungulwilo? Ngolo ja kaye? Ngolo ja liuka? Ngolo ja Shipilitu Wajila! Echi chikiko chihela chakuswama chaliuka. Kaha omwo liuka linetavila vakakunangula vakutanga, kaha mazuvo amanene na jisenge, kachi Shipilitu Wajila wamwaka, vakiko navaya nakupwa mukuluma. Amena. Muchano. Namuya ngachilihi nakupwa na kuhizumuka cha Shipilitu Wajila, kaha vathu vajimine Chize na kukasa Chize kaha vali nawoma wa Chize? Haze hakiko hali ukalu.

⁷⁴ “Va Fwilishite vali hali ove.” Oloze umwe kaha ikiye ou napu lutalililo lwakukisula etu tuli nalwo, shimbu Samasaone apwile mukamenga . . .

⁷⁵ Chuma muka chakulivanga vakiko valingile omwo vakiko vamukwachile? Vakiko vamukashile, chatete. Vakiko vamufumishile ngolo, vawanyine chiswamo chenyi. Vakiko navawana chiswamo chove. Kaye nakawana chiswamo chove. Jino enu mapwevo enu mweji kuteulanga, echi chili nakuya nge kaye. Enu malunga mweji kuyanga nakulinga nge kaye. Echi chili chakwoloka, kuhanjika usese kaha usese wamajilo, kaha kuya na kunwa makanya amandende, kaha kulinga ujila na mapwevo javaze mwalihata navo, kaha navyuma vyosena nge ngachize, kunwako chindende kukwachilila mulimo wove. Chamwaza kusavala mujimo lyami na chindanda cha mukele na kunwa meya amumutango, na kutwama wakuzeneka majilo kaha utoma kumeso a Kalunga, kahambakana kulinwasana ha kala mulimo. Echi chakwoloka. Muchano. Twama mumuchano na Kalunga.

⁷⁶ “Samasone, va Fwilishite vali hali ove.” Mbalaka ya Branham, vilinga vyakaye vinalijingila mukachikenu. Ngachilihi echi? Unasolola chiswamo chove? Unasolola chize chiswamo chize Kalunga akuhanyine omwo wapwile nakulyalanga muze mulukungu myaka yayindende hanyima? Unehela echi chilijinge na chiseke, kulifukula chakufutula? Chasolokele ngachilihi kuli ove? Kalunga nahase kwiza nakuzata chikomwesa na kuya nakuhita mukachi ka michima kaha nakulweka vathu viswamo vili mimichima yavo, na kalachuma chosena, na kuhindula vakakuviza na kuyajiwisa, kaha kulinga vinjikizo na vikomwesa, na kunangula Lizu Lyenyi

na ngolo nge omu vakiko vahashile, hali Shipilitu Wajila; kaha vathu ngwavo, “Chamwaza, Ngwashinganyeka nge vyosena vili vya kwoloka. Etu tweji kuwahililanga kwivwulila kamwe nakamwe shimbu, nge katwazeyeleko.” Mukiko mu Mbalaka ya Branham. Va Fwilishite vali hali ove.

⁷⁷ Omwo, chapwilenga omwo kunangula cha Lizu, kaha vakakujila vamwaka na masoji mumeso avo, navaya nakukatuka namahinji avo na kwenda, kuliyomba, pamo nakuhanjika lizu, kutambuka nakuya, kavali mokomoko katatu, kaha kutwama hamavu, shikaho vakuzala na Shipilitu Wajila! Eli Lizu lyavalishilenga! “Muthu keshi kukayoyela ha mbolo kahako, oloze ha Lizu lyosena nalifuma mukanwa ka Kalunga.” Va fwilishite vali hali ove, Mbalaka ya Branham.

Va fwilishite vali hali ove, Pendekosita.

⁷⁸ Eyovene, va Fwilishite vanakukwate ove, enu vosena, lwola lwakunyima omwo enu mwalivwasanyine enu vavavene kumikasa, kakwechi chimwe nachiza nakwingila ’kuvanga ove wapwile wumuka Pulishiteliyani, Mbaputishiti, Mesondisiti, Katolika, mokomoko chumachimwe. Enu keshi kamweshi nachuma chimweko chakulinga navosenako.

⁷⁹ Shikaho, kuhizumuka mulikumbi lyetu? Natupwa nacho ngachilihi omwo uze mukakuhana kuhizumuka ali wakukashiwa na kaye? Kalunga keshi kuhasa kwiza muze muli kaye, enu kamweshi kuhasa kukundamina hali chizeko. Enu munalikate na kaye, kahajino echi chili—echi chili chosena. Nge namwecha kaye kulijinga nakwingila muli enu, namuya nakulinga nge kaye, kahajino kaha enu mwakumu. Oloze nge namuya nakuvatula mangona osena kufuma kukaye, na kwiza kuli Kalunga, Kalunga mwaya nakumizachisa enu palanga.

⁸⁰ Hano hakiko hali kaha lutalilo Nguli nalwo chimene chino, kukukulula Mujimbu wami, chili ngana, “Shimbu Samasone apwile wakukasa, jikambu jikwavo jajihaya jasokele.”

⁸¹ Kalunga atume Liuka likwavo shimbu kanda lwola lwa makumishilo, nge Ngolo ja Shipilitu Wajila jizenga nakwingila mulikiko, mukusoloka cha Shipilitu, kaha Mako 16 mwakavangiza Liuka, Vilinga 2:4, Vilinga 2:38, vyosena naviya nakukavangiza hamwe na Liuka. Vinjikizo na vikomwesa navikatwamanga nava Positolo. Vinjikizo vyavinene vya kusanguka Chenyi kutwamanga navakiko. Shimbu tuli mukamenga, punduvene Kalunga ali nakukulisa mbuto kumwe, ya kujiha chamakumishilo. Pamo enu, masepa jami Vakakulishitu muli muno chimene chino, echa echi chipwenga ngolo jenu japutuka kukula. Ngwalombo ngana ou Mujimbu chimene chino, na kwosena mulifuchi okwo naukaya, Ngwafwelela ngana ou Mujimbu nauya nakukafwa kuneha vitamin kuzachiso jenu mangana mukaye nakukula mu Ngolo jashipilitu kukinduluka cheka muchiyoyelo chenu.

Echa tunongamenu mitwe yetu na kulomba.

⁸² Ove Mwata Kalunga, Tengi ya Melu na mavu, Mwenya Kuyoya Chahaya myaka, kaha Mukakuhana vya mwaza vyosena na wana wamushipilitu, mbata awa mazu chimene chino na kuwahaka mukachi kamuchima, na kuwatukumwina, Mwata. Echa vathu valombe hali evi vyuma, kumona nge kaye kanambembejeka liuka kaha kanawane Ngolo jacho, kuwana chihela chachiwamo, kuwana kuze kwatwama chiswamo chacho, kaha vanaliteula. Nambate vathu vase lwola lumwe vatambakanyinenga kuhasa, vase vapwilenga nakuhasa, kaha vanavateula, ku kutwama hemo lya Chitatu na ufuku nakutala hachizaji chamivwimbimbi. Chinambate kuwahilila kufumisa mukachi kamichima yavo, na kuvahana vakiko zangi yayinene yakaye kuhambakana vakiko kupwa nayo ya Kalunga. Navahane chikuma kaye chikuma, vya kaye, kupwa nakufwila chiseke cha kaye kuhambakana kunangula Mujimbu wamwaza. Kachi kuli lungoji lwalunene na vyakulitwalilaho, kaha kutuhuma na kutwalilaho, kahajino vakiko kavatondele Mujimbu wamwaka, keshi chekako, echi nachineha kuwahilila kumyono, echi chili nakuneha kuka cha Ukalunga, echi chinakindulwisa mawana aupositolo kuliuka, chili nakuneha kusanguka cha Kulishitu, ou Meshiya ya likumbi lyalelo.

⁸³ Oloze nge Isalele apwile wakukashiwa na—na vamyangana javo, nge vakiko kavatela kufwelela kupwa Mwangana wamwenemwene; kaha Mwangana wamwenemwene, omwo Ikiye ejile, vakiko kavamwijivile Ikiye ko. Shikaho mukiko chili lelo. Ove Mwata, Mwangana wa Upahu nasoloka muchifwanyisa cha Shipilitu Wajjila, kaha, Mwata, vakiko kavatachikijileko. Vakiko kavachitachikijileko. Vakiko vali vakulinunga chikuma, nge vakiko kavachivwishishileko, mwomwo kacheshi mukulivwasanako. Mwata, ou uli mulimo wa liyavolo unalingi echi kuli vathu.

⁸⁴ Echa Samasone wa Kalunga, echa wamuchano mumuchima, vase vali nakuvandamina na kulila, nakulembelela na kukwachilila, echa vakiko vatwame nechi, Mwata, palanga echi chimbuto chachihya kusoka, Palanga nakukwiza cheka cha kuwahilila mu Jiyone, kaha nakuya nakupwa lizavu lize nalilivwasana na kwivwishisa, mangana vahase kumona Meshiya na Ngolo jakusweka jize jakusweka kukaye, jize vakiko navahona kwivwushisa jino. Tuhanecho, Mwata, mangana vayanga nakumona echi. Echi etu tunachihulu mu Lijina lya Yesu. Amena.

[Hatepu hapimbi—Muka.]

. . . Ngolo kaha jino,

Ove Mwata, tuma eji Ngolo kaha jino

Na kujimika vosena.

Vakiko vapwile mukapete kahelu,
 Vakiko vapwile vosena nakujina chimwe,
 Omwo Shipilitu Wajila asulukile
 Uze vashikile kuli Mwata.

Ove Mwata, tuma Ngolo Jove kaha jino,
 Ove Mwata, tuma Ngolo Jove kaha jino;
 Ove Mwata, tuma eji Ngolo kaha jino
 Na kujimika vosena.

⁸⁵ Omwo Ngwamuzanga Ikiye! Tuma kaha Ngolo Jove! Vakiko vapwile mukapete kahelu, vosena nakujina chimwe. Kaye kosena vanakafumisa mulivakiko. Vakiko vapwile vaupolongwa, kaha Shipilitu Wajila ejile.

⁸⁶ Lelo veji kuhanjikanga ngwavo, “Twaya, ulinunge na liuka, haka lijina lyove mu mukanda. Mokomoko nongama na kuhanjika ngwove, ‘Ngunetavila Kulishitu kupwa Mwana Kalunga,’ katuka.” Ou liyavolo eji kulinganga chuma chochimwe. Punduvene. Ou liyavolo vamujimikile omwo Yuta vamujimikile. Ou liyavolo alovokele nakuya nakunangula Mujimbu wamwaza omwo Yuta alovokele na kuya nakunangula Mujimbu wamwaza. Oloze liyavolo katambwile Shipilitu Wajila ko. Omu mukiko. Aha hakiko hali Ngolo jakuswama, chikiko kusanguka, vaze vanatachikiza ukangule, kuhambakana numba thuhu kukakasana. Amena.

⁸⁷ Ikiye ali hano. Ou Shipilitu Wajila youmwe, uze Umwe apwile hali Meshiya, hanga ali ha Liuka Lyenyi. Ikiye kayako. “Nangukaya nakupwa nayenu lwola lwosena, namuli enu, na kumakumishilo akaye. Nanguya nakukapwako. Eyi milimo Ngweji kulinganga, naukaya nakuyilinga nawa. Kuhambakana eyi, mwomwo Nguli nakuya kuli Tata Yami.”

⁸⁸ Oloze kaye kalivwasanyine hali echi, “Mamalelo, aze makumbi kana ahita lyehi!” Omu mukiko atonda liyavolo enu kulinga. Vakiko vatonda enu mulitohwese. Kalunga atonda enu kumijimika. Kalunga atonda enu. . . Enu ngwenu, “Mamalelo, Kangwafwelela evi vyosena vilinakuhitako.” Yenunga kulutwe na kuyoyanga, yenunga kulutwe na kuyoyanga mushili jenu, yoyenunga mushili jenu. Oloze palanga nomu namupola, palanga enu namupola kuvishinganyeka vyenu, palanga enu namupola kukuwala chakuhandunuka handunuka, kaha kupwa vakutungulula cheka na kusemuka chachihya, kaha echi Kuyoya chachihya nachipwa chosena hamwe chakuhandunuka kufuma kuli chize chashikumukile.

⁸⁹ Nge linona nalishikumuka nalipwa lya ngengu, nalikalovoka lichila. Lize lyashikumukile, lyakufwika, nalilovoka lyalivwovwu kaha kulihuhwa napeho. Mamalelo, upahu! Haleluya! Omwo jipeho najiputuka kuhuhwa, lize linona kalyeshi kuhasa kulinga numba chuma chimweko oloze lyeji kutambuka livene, kununguluka, oloze kaze kakandende—kaze

kakandende kamutwe kulovoka na kuwahilila, kukula jinonyi, kulizamisa kavene. Kakeshi keza nakupwa kamutwe chekako palanga linona linafu kaha linapolo. Keshi kufwa kahako; oloze kupola. Kalyeshi kakinduluka chekako, oloze kuyoya nachika lovoka.

⁹⁰ Nge omu Ngwahanjikanga hanyima, nge kusemuka chuma chachikalu, chaunyengwe, majilo, unyengwe wa unyengwe, oloze mukiko muli kuyoya. Omwo naulyanuka ove lyavene kupwa waunyengwe, kulyanuka ove lyavene Mesondisiti, Mbaputishiti na vilinga vya Pendekosita kupwa unyengwe, na kufwa kukamenga, kahajino Kuyoya chachihya nachiza nakwingilamo. Ou Shipilitu Wajila makulingisa ove kupwa helu yachize; mulinakumona Kalunga.

⁹¹ Etu natukaya nakumumona Ikiye likumbi limwe lyaupahu. Likumbi limwe kuhambakana kufwa, natukaya nakumumona Ikiye. Enu mwafwelela chize? Likumbi limwe kuhambakana kufwa, kuli nakunguvandamina hamene chamwaza.

⁹² Ngwapwile ngunemana hano hambango ufuku unahichi, kaha Ngwashinganyekele nge ngwamono wamundende Rabbi Lawson. Omwo apwilenga nakupwa kuno, kwiza na mukombo wenyi chamwaka nakungukoka na shingo yenyi, kujingilika shingo yami na mukombo wenyi, kuno kukamenga, na kwimba uze mwaso, “Vali nakunguvandamina...” [Hatepu hapimbi—Muka]. . . ? . . .

⁹³ Chuma chimwe chasolokele! Chize chambachile kaye. Ngwaputukile kumona vyuma vyakuhandunuka handunuka. Ngwalikomokelele chikuma mujila ava vathu va America valinakulinga, nakutwalilaho, ha mwaka ha mwaka, kumona mapwevo na malunga omwo vali nakulishikumwisa vavene na kuya mushili, palanga nomu Ngwapwile naukalu, luvali mokomoko lutatu, kulizakamina hali echi. Zau, Ngwahanjikanga kuli Kalunga, “Kangweshi kulizakaminako chekako. Lizu Lyove lyahanjika nachikapwa ngocho. Oloze Nanguya nakwimana mulipwata na kuvilika haliechi, na vyosena vili muli yami.”

⁹⁴ Likumbi likwavo, kwimana kuze ku Green’s Mill, muwina wami wamulilolwa, kuze mupambo, kupwa nakulomba likumbi lyosena. Kaha pamo seli koloko, likumbi lyapwile nakulauka, kaha Ngwemanyine kuze kutala ha kulusu, kulovoka muze muwina wamulilolwa, helu halilolwa lyalinene. Kaha Ngwemanyine kuze, kutalisa Kumututuko, kumwalisa Mwata. Kaha Ngwamwene likumbi lili nakutambuka kunyima yamitondo helu lya pili, shimbu Ngwatalile ha kulusu mutelezeji hali ikiko, nachize kumunyika, kupwa mukuunda nge omu lyapwile. Kaha Ngwambile ngwami, “Mwata, likumbi limwe Ove wamuswekele Mose mumwaji wa lilolwa, kaha Ove wamuhichile ikiye, mwomwo apwile hanazeye. Oloze Ove

wamuhichile, ikiye ahanjikile echi 'kusoloka nge nyima ya muthu.'" Ngwambile ngwami, "Ngusweke mumwaji, Mwata." Ha lwola luze, kusali yami, kwapwile Kapeho kakandende kuhita mukachi kamusenge. Katambukile nakuya, kejile kuli kusali kuliyami, Kapeho kakandende kutambuka kwiza, kayile mukachi kamitondo. Ngwemanyine kuze.

Likumbi limwe, Kalunga kaha ikiye nejiva
kulihi mokomoko lwola muka,
Awa mafumbo achiyoyelo nawakaya nakwima
kulu,
Kahajino Nangukaya nakutwama hapili ya
Ziyone.

Likumbi limwe kwakuhona kufwa kuheta,
Likumbi limwe, Kalunga kaha ikiye nejiva
kulihi mokomoko lwola muka,
(Chuma muka nachiya nakusoloka? Ikiye
mwakaya nakusoka, awa mafumbo
amandende osena kujinguluka.) Awa
mafumbo akuyoya nawakaya nakwimana
kulu,
Kahajino etu natukaya nakutwama hapili ya
Ziyone.

Kwiza mwishi, litemba lya liyema,
Kwiza nakungumbata nakungutwala Kwimbo;
Kwiza mwishi, litemba lya liyema,
Kwiza nakungumbata nakungutwala Kwimbo.

Kachi ove naulivanaga shimbu kanda Yami,
Kwiza nakungumbata nakungutwala Kwimbo;
Mulweke Ndumbu walunga Bosworth, na
masepa jami vosena, nawa,
Kwiza kaha nakungumbata nakungutwala
Kwimbo.

Jino kwiza mwishi... (Ikiye mwakaya
nakushikumuka likumbi limwe na
kungumbata helu)... lite-...
(Mutondo wosena naukaya nakupwa
kakahya; va Ngelo ja Kalunga, litemba
lya kakahya)... hakungumbata yami
nakungutwala Kwimbo;
Kwiza mwishi, litemba liyema,
Kwiza nakungumbata nakungutwala Kwimbo.

⁹⁵ Likumbi limwe hali awa makumbi, likumbi limwe hali awa makumbi mujiola jami jakufwa, Nangukamutalilila Ikiye omwo mwakeza. Echi chakwoloka.

Ngwatalile hali Yotau kaha Ngwamwene
chuma muka

Kwiza nakungumbata nakungutwala Kwimbo;
(nge kashinakaji Eliya kutala kusali ya
Yotau)

Lizavu lya Vangelo kwiza nakungwijila,
Vakiko vapwile nakwiza nakungwijila
nguyenga Kwimbo.

Kwiza kwishi, kushikumwisa, litemba liyema,
Kwiza nakungumbata nakungutwala Kwimbo;
Kwiza kwishi, litemba liyema,
Kwiza nakungumbata nakungutwala Kwimbo.

⁹⁶ Ou Mwata Yesu, ou wakukisula Nyamutekenya wa eli litemba, Mukakwendesa wa mbopolo yamwaka ya Ziyone, uze wato wa Kuyoya, kutambuka nakuhitangana muzuvo, kuhanjika, Meso Eyi ali hano. Uze Shipilitu Wajila amusangwile Ikiye kufuma muchimbumbali hano.

⁹⁷ Hakupwa kavahanangako makati akulombela, kuliko umwe muno nafumu kusali yayino mbaka, uze Ngunahono kutachikiza, ali muno mangana vamulombebele? Katulenu mavoko enu, uze Ngunahono kutachikiza. Katulenu mavoko enu, Ngunahono kutachikiza. Enu, enu okwo. Ngwafwelela uze mukwetu ali nawevwu kunyima kuze, muthuumwe nakatula livoko kunyima muli ize jila. Yaa, ove, wakatulanga livoko lyove? Chosena chakwoloka. Kunyima okwo, ove, mwane. Chosena chakwoloka. Enu muli vosena vangeji kuli yami? Oloze Mwata Yesu, uze youmwe Kafunga kautanga hano, enu mwafwelela jishiko Jenyi kupwa jamuchano? Ikiye eji kuwavwisa liuka Lyenyi, kaha “Milimo ize Ngweji kulinganga, namukalinga, nawa. Kuhambakana nenyi namukalinga, mwomwo Nanguya kuli Tata Yami. Kuhambakana eyi!” Enu mwafwelela echi?

⁹⁸ Ove wakatulanga livoko lyove nge kawangutachikizako? Ove wafwelela Kalunga nahase kungulweka chuma muka chili mumuchima wove, nahase kuhanjika kuli yami nge muze Alingile kuli uze pwevo akwachile kuchikuto Chenyi? Ove wafwelela nge Ikiye apwa Kapilishitu Wakulitulaho uze vanahase kukwata nakwivwa chamijimba yetu? Kachi Kalunga mwaya nakungusolwela maukalu, nauya nakungufwelela kupwa kapolofweto Kenyi, kufwelela nge Meso Eyi ali muno kaha shikangaho Ikiye netavila echi? Ove uli nakulombelako pwevo lyove. Ikiye akwechi thungi yakuhokoka, yafuma mumango yacho. Echi chakwoloka. Kachi kacheshi ngochoko, imana. Chosena chakwoloka, yako naumuwana, alikanawa. Amena.

⁹⁹ Ngachilihi ove kunyima okwo, ove mukwetu wamundende wakatukanga, uze apwanga nawevwu? Ove unafwelela na muchima wove wosena? Fwelela Kalunga nahase kungulweka ukalu wove wosena? Ove wafwelela nge mwanove mwaya

nakupwa kanawa? Ove wafwelela? Ukwechi kanyike walunga, ikiye akwechi kalepa. Echi chakwoloka. Ove kaweshiko... Echi kufuma Kentucky. Kachi echi chinapu chakwoloka, katula livoko lyove. Kangwakutachikiza oveko, Ngwakutachikiza? Kachi Ngwakutachikiza... Katula livoko mavoko ove *ngana*, etu katwalitachikiza umwe namukwavoko. Echi chakwoloka. Kufwelela kuli Kalunga. Ove wafwelela? Nge wafwelela, kawane uze kanyike walunga mujila ove wafwelela. Haka kaha echi mumuchima wove.

¹⁰⁰ Hiya hano vakatulanga mavoko avo, nge Ngwapwanga wakuhona—wakuhona... Apwanga ove? Chosena chakwoloka, mukulwane, ove wafwelela yami kupwa kapolofweto wa Kalunga? [Uze lunga ngwenyi, “Amena.”—Muka.] Ove wafwelela, namuchima wove wosena? Ove kawatela kukatukako, imana oho vene. Chosena chakwoloka, mwane, ukalu wove uka, ove ukwechi musongo washuka. [“Echi chakwoloka.”] Kaha echi chili nakuyanjisa chipundo chove. [“Yaa.”] Ove wafuma ku Ohio. [“Yaa.”] Lijina lyove lili Mukulwane Miller. [“Echi chakwoloka.”] Yako kwimbo na kuyoya. Chosena chakwoloka, fwelela na muchima wove wosena. Chosena chakwoloka.

Ove wafwelela na...Kufwelela echi. Kachi unahase kufwelela!

¹⁰¹ Ove pwevo wakalemesa natwame hano, wakatulanga livoko lyove? Pwevo wakalemesa wamunene, navivanjilo, ove wafwelela namuchima wove wosena? Ove unafwelela na...Ove unafwelela yami kupwa ngamba ya Kalunga? Ove wafwelela? Chosena chakwoloka, kachi Kalunga mwahasa kungulweka ukalu wove uka, nauya nakufwelela? Ukalu wamuchima. Chosena chakwoloka, katula livoko lyove kachi echi chakwoloka. Chosena chakwoloka.

¹⁰² Ove pwevo wakalemesa hano nalihate kuli ove, katuka. Muchima; oloze chikumanyi meso ove. Ngwamutachikiza. Chosena chakwoloka, kachi ove mufwelela!

¹⁰³ Kunyima okwo, lunga nashishimo kunyima okwo ukwechi ukalu wamuchima, nawa, na musonga wamuchikova. Ove wafwelela nge Kalunga mwaya nakukulingisa kupwa kanawa? Ove wafwelela, mwane?

¹⁰⁴ Kuli lunga kunyima okwo kumwe, akatulanga mavoko enyi uze kapwanga... Mukulwane Schubert. Chosena chakwoloka, mwane. Chosena chakwoloka, ove wafwelela? Echi chili cha meso ove, nawa, keshi ngochoko? Ove uli nakulombelelako noko natwame kuze, nawa. Kachi echi chinapu chakwoloka, katula livoko lyove. Etu tuvangeji. Echi chakwoloka? Tulimeneke, limenekenu kuli umwe namukwavo. Chosena chakwoloka, echi chakwoloka. Kachi ove unahase kufwelela, ove tambula!

105 Uze Yesu Kulishitu wakusanguka ali muno muzuvo. Ikiye apwa Youmwe. Chuma muka Echi nalingi kuli ove? Ove unechela kaye kufumisa ngolo jacho josena hali ove? Upahu! Ngwatondo kusemuka chachihya! Ngwatondo Kuyoya chachihya! Kangwalizakaminako Echi nachiza mundeke muka, kachi Nangupwa mukakujila wakulyalanga, kalamwosena. Kangwazakamako Echi nachiza mundeke muka, Ngwatondo Shipilitu Wajila wa mwenemwene nge omu ali hali yami jino. Ngwatondo kulama Echi! Chamwaza ngupwenga Nechi kuhambakana vyuma vyosena vya mukaye. Amena! Ove wafwelela? Ove wafwelela nge Ikiye ali muno?

106 Haka mavoko enu hali umwe namukwavo, kahajino. Ngulweke chuma chimwe chikwavo Ikiye nahase kulinga. Chauchi. Pwako nalufwelelo jino. Fwelela nge chinahichi.

107 Mwata Kalunga, Tengi ya Melu na mavu, Mweya Kuyoya Chahaya myaka, kaha Mukakuhana mawana amwaza, Shipilitu Yove ili hano yina wavisa, Mwata, chasoloka nge kuhwima chamuno muzuvo, chili nakuya kulutwe nakunyima. Mwomwoika vanahonene kwivwushisa echi, Mwata? Vanalikate—vanalikate na kaye chikuma, kaha vali vatuta kaha vasalusalu kaha vakujijila, palanga vakiko vanahono kutachikiza Ove numba mumwe? Mwata Kalunga, echa eji Ngolo jikwate kala muthu, na muthu mukakuviza wosena apwenga wakuhinduka, mukashili wosena kumulwila, kaha Kalunga atambule upahu. Kuhichila muli Yesu Kulishitu, ou Mwana Kalunga, Ngwalombo echi. Amena.

108 Enu mwafwelela echi? Katulenu mavoko enu. Enu munatambula kuka chenu? Kalunga amikisule. Jino yenunga na kuwana echi mujila enu munafwelela, nachiya nakupwa mujila kana. Ngweji kumona vimweno kusoloka hali veka. Echi chakwoloka. Ngwatela kukinduluka naufuku uno.

109 Kachi ove kaweshi kufwelela jino, kaha ove kawechi kafwelelako. Echi chakwoloka. Yesu achilingile lwola lumwe, kaha vakiko ngwavo, “Ove yove...Etu twatachikiza omwo Meshiya mwakeza, Ikiye mwakaya nakutulweka etu evi.” Uze pwevo ngwenyi, “Ngunatachikiza nge Meshiya mwaya nakulinga echi. Oloze Ove yove Hiya?”

Ikiye ngwenyi, “Yami Vene.”

110 Kahajino uze pwevo alahile nakwingila mumbongi kaha ngwenyi, “Twayenu, mumone uno Lunga Ou natachikiza omwo Ngwapwa na ovyo Ngwalinga. Ou keshi ikiye Meshiyako?”

111 Ikiye ngwenyi, “Vyuma kana naviya nakutungika cheka kumakumbi akumakumishilo. Eli Liuka naliya nakunangula Muchano, Naliya nakwimana ha Lizu. Nachiya nakulinga Jishimbi josena ja Kalunga. Kalyeshi kulikata na kayeko. Kaha kuhichila muze Nanguya nakwenda na kulinga vyuma vyovimwe.”

¹¹² Oloze Ikiye ngwenyi, “Vakiko navakapwa vakakulivwimba, vakakujina vyahelu, vakakuzanga chiseke kuhambakana Kalunga, vakakukana kukonekela vakwavo, vakuvangila vakwavo, vakwechi kufwana chakumukumoka kalunga,” vakusoloka kulifukula, vakakuya kumauka. “Vakwechi kufwana cha kumukumoka kalunga, oloze kukana Ngolo jacho. Kulivangachize vatalisenga nyima yove!”

¹¹³ Enu vathu, kwosena okwo muli mumauka, muze Ikiye amisanyikile jino, chimweno chinalovoka kufuma muli yami. Kachi—kachi nge ou unapu muchano, evi Ngunahanjika, kaha yami kupwa wakuhona kutachikiza kuli enu, katulenu mavoko enu, kala wosena. Liuka lyosena, wosena—wosena muthu. Chosena chakwoloka. Talenu? Kangwavatachikizako, kanda lyehi nguvamone vakiko; oloze Shipilitu Wajila ali hano kaha Ikiye navatachikiza. Munamono nge keshi yamiko?

¹¹⁴ Ivwililenu! Kachi Ikiye mwaya na kungukunjika echi kuli yami, Ikiye mwaya na kungufwelela yami na Muchano wa Lizu, mwomwo ou Muchano nawiza kaha kuhichila mu Lizu. “Pihililenu nakwalumuka, muthu wosena, kaha vamijimike mu Lijina Iya Yesu Kulishitu, chakuneha kukonekela jishili, kaha enu namuya nakutambula wana wa Shipilitu Wajila, mwomwo lushiko kana luli kuli enu na kuli vana venu, vaze vali kwakusuku, na kuli vavavulu vaze Mwata Kalunga ketu mwakasanyika.” Enu mwafwelela echi? Kuli nakuya nakupwa kutanga chakujimika mulwola lwalundende.

¹¹⁵ Echa tunongamenu mitwe yetu. Nanguya nakuhula kafunga alombe shimbu vakiko valinakulinakuwahisa kujimika. Ngwashinganyeka kuli kutanga cha kujimika chili nakwiza. Chosena chakwoloka.



LIUKA VANA HUNGUMWISA, KU KAYE LVE59-0628M

(A Deceived Church, By The World)

KWALA CHA LIUKA

Ou Mujimbu kufuma kuli Ndumbu wa lunga William Marrion Branham, vawambulwile hakuputuka mu Ingilishi ha Chalumingo na chimene, Shika munene 28, 1959, mu Mbalaka ya Branham mu Jeffersonville, Indiana, U.S.A., vanaufumisa mu muzu vakopele ha tepu na kuusoneka mu Ingilishi chakuzeneka kuwalumuna. Echi kwalumuna Lilimi vachinungulwile vausonekele na kuupangila kuli vaka Kukopa cha Lizu Lya Kalunga.

LUVALE

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Tachikizenu lisesa lyakufwatula

Kulama lisesa lya kufwatula. Ou mukanda vanahase kuufwatula kumakina akuvulisa a hembo kupwa wakuzachisa kuli muthu hakapanji kenya mokomoko kuhana kweka, wa wana wakanyombo, kupwa chitwa chakutanjisa Mujimbu wamwaza wa Yesu Kulishitu. Ou mukanda kavatela kuulanjisako, chipwe kuyitunga yayivulu chikuma, chipwe kuyihaka ha peho ha website, kuyitulika muze vanahase kuyifumisa, kulumbununa mu malimi eka, mokomoko kuuzachisa kupwa jila yakutambwilamo mali chakuzeneka lisesa lya kusoneka kufuma kuli vaka Voice Of God Recordings®.

Mwatondo kutachikiza vyavivulu mokomoko vyuma vikwavo, kaha sonekelenu ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org